

浙江通志

南

浙江省圖


福建界

9

江西界

西

江南界



中华书局

浙江省圖

清雍正朝

浙江通志

9



中華書局

敕修《浙江通志》卷一百五十八

人 物 一

名臣一

爵无论崇卑，必其言行功烈足以师表人伦，经纬天地，而后名斯显焉。两浙自汉唐以来，扬历中外之臣，著丹青而垂竹帛者，列郡中踵相接也。皇朝任贤使能，百工允厘，寅亮尤著，汇而辑之，均足光昭川岳，为后来者法则矣！志名臣。

杭州府

唐

褚遂良《唐书》本传：字登善，杭州钱塘人。通直散骑常侍亮子，授秦王府铠曹参军。贞观中，累迁起居郎，谏罢封禅，迁谏议大夫兼知起居事。帝曰：“朕有不善，卿必记耶？”对曰：“守道不如守官，臣职载笔，君举必书。”是时，魏王泰礼秩如嫡，群臣未敢谏。遂良曰：“太子、诸王，宜有定分。”帝曰：“有是哉，公等为我柬贤者保傅之。”于时，皇子虽幼，皆外任都督、刺史。遂良谏曰：“刺史，民之师帅也，皇子未冠者，可且留京师，教以经学，养成德器。审堪临州，然后敦遣。”帝嘉纳，诏遂良等定策，立晋王为皇太子。授太子宾客，进黄门侍郎，参综朝政，拜中书令。帝寝疾，召遂良、长孙无忌曰：“汉武帝寄霍光，刘备托诸葛亮，朕今委卿矣。”高宗即位，封河南县公，进郡公，拜吏部尚书，同中书门下三品，进拜尚书右仆射。帝将立武昭仪，遂良曰：“皇后无他过不可废。”帝不悦，翌日复言，对曰：“陛下必欲改立后，请更择贵姓。昭仪昔事先帝，身接帷第。今立之，奈天下耳目何？”帝羞默，遂良因致笏殿阶，叩头流血曰：“还陛下此笏，丐归田里。”帝大怒，命引出。武氏立，乃左迁潭州都督，徙桂州。未几，贬爱州刺史，岁余卒。神龙中复官爵。德宗追赠太尉。

宋

谢绛《宋史》本传：字希深，富阳人。举进士甲科，知汝阴县，以荐擢秘阁校理，出通判常州。天圣中，天下旱蝗起，河决滑州。绛上疏请下诏引咎，罢役省敛，休息天下。仁宗嘉纳之。迁祠部员外郎，通判河南府。虽在外，犹数论事。会郭后废，绛陈《白华》诗，引申后、褒姒事以讽，辞甚切至。再迁兵部员外郎。请罢内降，凡诏令皆由中书枢密院，然后施行。擢知制诰，判吏部流内铨。吏部拟官，旧视职由有无，不问多寡，以是不均。绛为核其实，以多寡为差，其有名而无实者皆不用，人以为便。请知邓州，按召信臣六门堰遗迹，请复修之，未就而卒。

杨大雅《宋史》本传：字子正，家钱塘。进士及第，历迁秘书丞。咸平中，召试直集贤院，知应天府。还，以兵部郎中知制诰。大雅初名侃，至是避真宗藩邸讳，诏改之。居二岁，拜右谏议大夫、集贤院学士。知亳州，卒。大雅朴学自信，无所阿附，直集贤院二十五年不迁，有出其后者，往往致荣显，或笑其违世自守。大雅叹曰：“吾不学乎世，而学乎圣人，由是以往。吾之所有不敢以荐于人，而尝自献乎天子矣。”天禧中，使淮南，遇风覆舟，冠服尽丧。时丁谓镇金陵，遗衣一袭，大雅辞不受，谓以为歎，宰相王钦若亦不悦之。万历《杭州府志》：大雅十岁作《雪赋》，及长，日诵万言，以乙科登第。咸平三年，交趾献犀，大雅献《犀赋》，召试学士院。明年，献所为文二十余万言，乃直集贤院，仕终集贤院学士。出知亳州卒。所著有《大隐集》、《职林》、《两汉博闻》若干卷。

钱彦远《宋史》本传：字子高，以父荫，累迁大理寺丞。举进士第，历官尚书祠部员外郎，知润州。时旱蝗，民乏食，彦远发常平仓赈救之。部使者责其专，不为屈。召为右司谏，请勿数赦，择牧守，增奉入以养廉吏，息土木以省工费。迁起居舍人，直集贤院，知谏院，其任言职，数有建明，卒于官。谨按：钱彦远以下三人，皆吴越王诸孙，史不系籍贯。《咸淳临安志》概从收入，今仍之。

钱勰《宋史》本传：字穆父，彦远子，以荫授流内铨主簿。神宗召对，将任以清要官。王安石使弟来见，许用为御史。勰谢曰：“家贫母老，不能为万里行。”安石知不附己，命权盐铁判官。奉使吊高丽，馈饷皆弗纳。王遣二吏

追饷金银器四千两，竟却之。还，拜中书舍人。元祐初，迁给事中，知开封府，老吏畏其敏。召拜户部侍郎，进尚书，加龙图阁直学士，复知开封，临事益精敏。哲宗莅政，翰林缺学士，章惇三荐林希，帝以命颺。惇讽全台攻之，罢知池州，卒於官。

钱即《宋史》本传：字中道。第进士，历陕西转运判官。王师复银州，转饷最。徽宗召对，问曰：“灵武可取乎？”对曰：“愿敕边臣先为不可胜以待衅，庶可得志。”帝然之。除直龙图阁，知庆州。至镇，筑安边城、归德堡。包地万顷，纵耕其中，岁得粟数十万。徙知延安府。童贯宣抚陕西，计司承望风旨，减市价，又行均余法，贱入民粟，而高金帛估以赏，下至蕃兵射士之授田者，咸被抑配，关中骚然。即抗章极陈其害，被贬。睦寇作，起知宣州，进龙图阁学士，以正奉大夫致仕。卒谥忠定。

沈括《宋史》本传：字存中，钱塘人。擢进士，屡迁集贤校理，察访两浙农田水利，迁太常丞。时大籍民车。又市易司患蜀盐不禁，欲尽实私井，而犖解池盐给之。言者论二事如织，皆不省。括侍帝侧，帝顾曰：“卿知籍车乎？”对曰：“敢问欲何用？”帝曰：“北边以马取胜，非车不足以当之。”括曰：“古人所谓兵车者，轻车也。五御折旋，利于捷速。今民间輜车重大，日不能三十里，故世谓之太平车，但可施于无事之日尔。”帝喜曰：“人言无及此者。”遂问蜀盐事，对曰：“万、戎、泸间夷界小井尤多，不可猝绝也。势须列堠加警，臣恐得不足偿费。”帝领之。明日，二事俱寝。擢知制诰，为河北西路察访使。先是，银冶，转运司置官收其利，括言：“近宝则国贫，人众则囊橐奸伪。朝廷岁遗契丹银千万，以非北方所有，故重而利之。昔日银城县、银坊城皆没于彼，使其知凿山之利，则中国之币益轻，何赖岁饷，邻衅将自兹始矣！”诏可之。辽萧禧来理河东黄嵬地，留馆不肯辞，曰：“必得请而后反。”帝遣括往聘，括诣枢密院阅故牍，得顷岁所议疆地书，指古长城为境，今所争盖三十里远，表论之。帝召对，喜曰：“大臣殊不究本末，几误国事。”命以画图示禧，禧议始屈。使行至契丹庭，契丹相杨益戒来议曰：“数里之地不忍，而轻绝好乎？”括曰：“师直为壮，曲为老，今北朝弃先君之大信，以威用其民，非我朝之不利也。”凡六会，契丹知不可夺，遂舍黄嵬，而以大池请。括乃还，拜翰林学士，出知延州。朝廷出宿卫之师来戍，赏赉至再，而不及镇兵。括以为卫兵虽重，而无岁不戍者，镇兵也，今不均若是，且召乱。乃藏敕书而矫制赐缗钱数万，以驿闻。诏报曰：

“此右府颁行之失，非卿察事机，必扰军政。”元祐中，以光禄少卿分司居润，卒。

陆诜《宋史》本传：字介夫，余杭人。进士起家，签书北京判官，历南北转运使，直集英院，进集贤殿修撰，知桂州。自侂彘定后，交人浸骄。诜至部，集左右江四十五峒首诣麾下，阅简工丁五万，补置将吏，军声益张，交人遣使入贡。知延州，谅祚攻围大顺城。诜谓不稍加折诘，则国威不立，乃留止请时服使者及岁赐，而移宥州问故。谅祚闻之，大沮。明年，又乞留赐冬服，而自以帅牒告之故，谅祚始因诜谢罪，共贡职。改龙图阁学士，知成都。青苗法出，诜言：“蜀峡刀耕火种，民常不足。今省税科折已重，其民轻侈不为储积，脱岁俭不能偿逋，适陷之死地。愿罢四路使者。”诏独置成都府一路。熙宁三年卒。

孙髡《宋史》本传：字叔静，钱塘人。用父任，调武平尉，历福建转运判官，召为屯田员外。髡微时，与蔡京善，至是，京还朝遇诸涂。京逆谓曰：“我若用于天子，愿助我。”髡曰：“公诚能谨守祖宗之法，以正论辅人主，示节俭以先百吏，而绝口不言兵，天下幸甚。髡何为者。”京默然。既相，出提点江东刑狱。未几，入为少府少监、户部郎中。县官用度无艺，髡疏谕之。当国者不乐，徙开封。迁太仆卿，殿中少监。知曹州，徙鄂州。邑人子为草祭之谣，指切蔡京。髡以闻，京怒，使言者诬以他谤，提举鸿庆宫，致仕。卒谥通靖。

虞策《宋史》本传：字经臣，钱塘人。登进士第，历湖南转运判官，召为监察御史，进右正言。数上书论事。哲宗纳后，上《正始要言》。迁左司谏。帝亲政，条所当先者五十六事，后多施行。累官吏部尚书，奏疏徽宗，请均节财用，曰：“考皇祐所入三千九百万，而费才三之一；治平四千四百万，而费五之一；熙宁五千六十万，而费尽之。今诸道随一月所需，旋为袞会，汲汲然不能终日，愿深裁浮冗以宽用度。”属疾祈外，知润州，卒于道。弟奕。

虞奕《宋史》本传：字纯臣。第进士，累擢监察御史，提点河南刑狱。自何承矩创边地为塘泺，有定界。既中贵人典领，以屯田开拓为功，肆侵民田。民上诉，屡出使者按治，皆不敢与直。奕曲折上之，疏其五不可，诏罢屯田。历迁光禄卿、户部侍郎。内侍总领内藏，视户部如僚属。度支郎方讨理滞，奉中旨令开封尹与总领者来。奕白宰相曰：“计臣不才，当去之而易能者，不可使他人侵其官。”即自劾不称职。诏罢内侍，徙奕工部。集庆守张濬请登封，

东平守王覲谏以岁凶多盗，不当请封。为政者将罪覲，实言：“覲忧民爱君，所以当奖激，奈何用为罪乎？”覲获免。卒，赠龙图阁学士。

张九成《宋史》本传：字子韶，其先开封人，徙居钱塘。游京师，从杨时学。权贵托人致币，曰：“肯从吾游，当荐之馆阁。”九成笑曰：“王良尚羞与嬖奚乘，吾可为贵游客耶？”绍兴二年对策，擢首选，授镇东军签判提刑。张宗臣欲逮捕数十人，九成争之。宗臣曰：“此事左相封来。”九成曰：“主上屡下恤刑之诏，公不体圣意而观望宰相耶？”即投檄归。赵鼎荐，召迁著作郎，言：“陛下以省刑为急，而理官不以恤刑为念，欲诏理官，活几人者与减磨勘。”从之。权刑部侍郎。法寺以大辟成案上，九成请覆实，果诬服者。金人议和，九成谓赵鼎曰：“金实厌兵，而张虚声以撼中国。因言十事，彼诚能从吾所言，则与之和。使权在朝廷。”鼎既罢，秦桧诱之曰：“且成桧此事。”九成曰：“九成胡为异议，特不可轻易以苟安耳。”桧曰：“立朝须优游委曲。”九成曰：“未有枉己而能直人。”上问以和议，九成曰：“敌情多诈，不可不察。”因在经筵言西汉灾异事，桧甚恶之，谪守邵州。丁父忧，免丧，桧令司谏詹大方论其与径山僧宗杲谤讟朝政，谪居南安军。在南安十四年，广帅致贻金，九成悉归之。桧死，起知温州。户部遣吏督军粮，民苦之。九成移书痛陈其弊，户部持之，九成即丐祠归，数月病卒。九成研思经学，多有训解。宝庆初，特赠太师，封崇国公，谥文忠。

何铸《宋史》本传：字伯寿，余杭人。政和五年进士第，历官殿中侍御史，擢右谏议大夫，寻拜御史中丞。先是，秦桧力主和议，大将岳飞有战功，金人所深忌。桧恶其异己，欲除之。胁飞故将王贵上变，逮飞系大理狱，命铸鞠之，阅实俱无验。铸察其冤，白之桧。桧不悦曰：“此上意也。”铸曰：“铸岂区区为一岳飞者。强敌未灭，无故戮一大将，失士卒心，非社稷之长计。”桧语塞，改命万俟卨。飞死狱中，桧讽卨论铸私岳飞为反，欲窜诸岭表。帝不从，止谪徽州，后提举江州太平兴国宫。卒。嘉定初，谥恭敏。

凌景夏咸淳《临安志》：字季文，余杭人。绍兴二年，对策第二，擢秘书省正字，迁著作佐郎。与胡珵、朱松、张广、常明、范如圭等六人，其奏封事，言和议非便。秦桧憾之，斥知外郡及闲居，凡十余年。桧死，除起居舍人，未几，直龙图阁，知鼎州。奏免程昌禹所增蔡州官兵衣粮六万四千余缗，诏减四分之一。除吏部侍郎，奏论吏部七司有法有例，法可按籍，而视例则散于案牘之

中，匿于吏胥之手。官有去来，不能遽知。臣愚以为，吏部七司宜置例册，凡经取旨或堂白者，每一事已，命郎官画时拟定，长貳书之于册，以为例，每半年上于尚书，用印给下。如此，则前后予决悉在有司之目，猾吏无所措巧，铨选渐以平允。诏吏部措置申省。

樊光远万历《杭州府志》：字茂实，钱塘人。绍兴五年，南省奏名第一，除秘书省正字。上疏言：“今日士大夫之论，莫不以金人诡诈为可忧。臣独曰，诡诈不足忧，而信其诡诈实深可惧也。愿陛下勿以得地为喜，而常以为忧；勿罪忠谏，以养敢言之气；勿喜迎合，以开滥进之门；勿尽民力，宜爱惜之以固根本；勿沮士气，宜耸动之以备缓急。”秦桧将遂休兵，罢为閩州教授。后召为秘书丞，除监察御史，寻补外，知严州。时三衙诱掠近郡平民为军，光远奏乞禁止，诏三衙自今止见管兵为额。又言本州岁输御炉炭七万四千五百斤，而不偿民间之直，上亟罢之。

赵汝谈《宋史》本传：字履常，登淳熙十一年进士第，调汀州教授。佐丞相赵汝愚定大策。汝愚欲骤以词掖处之，力辞。汝愚去国，罹党祸斥去。寻召为太社令。时侂胄用事，炽甚。汝谈痛愤，登坛读祝，大呼侂胄及陈自强名。自强不能堪。以参知政事李壁荐，召试，擢正字，改知无为军，献料敌备边二策，历湖北、江西提举。贺理宗表，力寓劝戒。端平初，以礼部郎官召对，言：“倚用老成，广集忠智，愿加圣心。”又言：“大佞似忠，大奸似圣，擢任之始，未见甚失，乃浸至差讹，则是非邪正易位，而黜陟予夺失中多矣。”改秘书少监。时集议出师，汝谈反覆言不可轻战，而和尤非计。既而三京收复，虽前言用兵不便者亦喜，汝谈独有忧色。未几，洛师败，始服其先见。迁宗正少卿，权吏部侍郎，升侍读。朝议履亩称楮，汝谈言非便，违时宰意。京师军变，宰相乞贬秩，汝谈持不可，草答诏，以为贬秩易，审举措难。宰相滋不悦。以言去。起知婺州，召权礼部侍郎。登对，首疏言：“边曲无可倚仗，乞超越拘挛，简拔俊杰，使各分方面：巴蜀一人，荆襄一人，两淮各一人，一切便宜行事，不复更从中御，庶几伸缩由己，机用出心。”且曰：“臣之此策，行于开禧未用兵之前，决不至罹今日之患。”其论楮法，尤中时弊，上称叹久之。以老祈免，改侍讲，权给事中，权刑部尚书。及卒，转两官，遗表上，又转四官。

谨按：汝谈，史缺系籍。考咸淳《临安志》云：太宗八世孙，居余杭。嘉熙元年卒，景定四年谥文懿，足补史氏之缺云。

俞烈咸淳《临安志》：字若晦，临安人。淳熙八年，试礼部第一。嘉定初，知庆元府，镇以清静。移知镇江。时淮民流移充斥，多方拯救。郡有大夹冈、小夹冈，乃漕运路，雨余泥深，牵夫失足，辄堕数十尺下，烈为甃之，始无陷溺。权吏部侍郎，乞浚练湖，通漕广溉。兼中书舍人，勳戚滥恩，貂珥佚罚，宫掖夤缘干请，多格不行。寻兼侍读，卒。

赵希馆《宋史》本传：字君锡，旧名希喆，登庆元二年进士第，改赐今名。调汀州司户。峒寇李元砺方起，郡会僚佐画守城策。希馆下坐曰：“守城非策也，距城三十里有关，曰古城，若悉精锐以扼其冲，贼不足虑矣。”守以付希馆，希馆严兵以待。贼至，矢石俱下，无一免。事闻，诏升推官，改知玉山县。召对，首言：“民力困于贪吏，军力困于馈帅，国家之力则外困于归附之卒，内困于浮冗之费。”宁宗嘉纳之。授大理丞，历转练防御使。理宗即位，进安德承宣使。引对，言：“初政急务，莫先于明道统，总治统，收人心。”上为之动容。后升节度，封信安郡公。

谨按：希馆，史亦不著籍贯，今从万历《杭州府志》收入。

洪咨夔《宋史》本传：字舜俞，於潜人。嘉定二年进士，应博学宏词科，崔与之辟置幕府，寻知龙州。州岁贡麸金，率科矿户。咨夔曰：“将奉上乃厉民乎？”出官钱市之。毁邓艾祠，更祠诸葛亮。告其民曰：“毋事仇讎而忘父母。”还朝，为秘书郎，迁金部员外郎。会诏求直言，慨然曰：“吾可以尽言悟主矣。”其父见其疏曰：“吾能吃茄子饭，汝无忧。”史弥远读至“济王之死，非陛下本心”，大恚，掷于地。转考功员外郎，转对，复言：“李全必为国患。”于是台谏李知孝、梁成大交论，镌二秩。读书故山。七年而弥远死，帝亲政五日，即以礼部员外郎召见。帝问今日急务，对以“进君子而退小人，开诚心而布公道”。且言：“在陛下一念坚凝。”又问在外人物，对以崔与之、真德秀、魏了翁。翼日，拜监察御史。咨夔感激知遇，曰：“朝无亲擢台谏久矣，亦当极本穷源而先论之。”乃上疏言：“中书弊端，其大者有四：曰自用、自专、自私、自固，愿于从容论道之顷，宣示臣言，俾大臣力惩往轍。”帝嘉纳之。又首乞罢枢密使薛极，以厉大臣之节。其他得罪清议者，相继劾去，朝纲大振。擢殿中侍御史，后进刑部尚书，拜翰林学士，加端明殿学士。卒。

李宗勉《宋史》本传：字强父，富阳人。开禧元年进士，历迁著作郎，入对，言边事。明年，兼权兵部郎官。李全叛谋已露，人莫敢言。宗勉独疏及

之，拜监察御史。时方谋出师汴、洛，宗勉言：“今士卒未精锐，城壁未缮修，守御犹不可，而欲进取乎？愿诏大臣爱日力以修内治，合人谋以严边防，仍飭沿边将帅，毋好虚名而受实害。”已而洛师溃，又言：“何地可控扼，何兵可调遣，何将可捍御，何粮可给饷，皆当预作措画。”拜殿中侍御史，诏条陈边事。宗勉奏请：“分上流、淮东、淮西为三帅，而以江淮大帅总之。以公私之财分给四处，俾之招募充补。仍选沿流诸郡将士为捍御之图，或谓其势强盛，宜于讲和，欲出金缗以奉之，是抱薪救火，空国与敌矣。”擢谏议大夫，进签书枢密院事。史嵩之开督府，力主和议。宗勉言：“嵩之职在督战，如收复襄、光，控扼施、澧，招集山峒，巩固江流，皆今所当为；若所主在和，则凡有机会可乘，不无退缩之意，必至虚捐岁月，坐失事功。”进参知政事，拜左丞相兼枢密使，守法度，抑侥幸，不私亲党，召用老成，尤乐闻谏言。以观文殿大学士致仕，卒，赠少师，谥文清。

章鉴《两浙名贤录》：字君宝，昌化人。嘉定十六年进士，调温州永嘉簿，历官国子司业，兼侍讲，进太府卿，以言免归。端平更化，首上封事，复召为讲官，兼掌内外制。时相专政，极论其蠹国，且乞罢职。尝上疏言：“进人不可太锐，听言不可不察。”擢兵部侍郎兼给事中，文华阁待制。以疾丐归，卒。鉴为人忠直厚淳，事有切于时者，必为精言之。时相疾其正论，每述以祸福，鉴不为动，深为理宗所知，特见亲礼。

赵景纬《宋史》本传：字德父，於潜人。登淳祐元年进士第，授江阴教授。丁母忧，以禄不逮养，服阙不调。景定元年，特授秘书郎，知台州。以化民成俗为先务，建黄岩县社仓六十有六，浚河道九十里，筑堤路三十里，节浮费，为下民代输秋苗。奏捐五邑坊河渡钱。进考功郎中，兼崇政殿说书，论监司守令曰：“与其纠劾于有罪之后，而未必尽得其情，孰若精择于未用之先，而使之各称其职。”忤出于柳，应诏上封事曰：“愿陛下捐内帑以绝壅利之谤，出嫔嬙以节用度之奢，弄权之貂寺屏之，毒民之恩泽侯黜之，择忠鯁敢言之士置台谏，选慈惠忠信之人为守宰。又必稽乾、淳以来，凡利源名窠之在百司庶府者，悉隶其旧。公田派买不均之弊，听民自陈，随宜通变。”咸淳元年，拜宗正少卿，兼权中书舍人，封还滥恩词头，帝从之。雷发非时，又言：“内批叠降而名器轻，宫闾不严而主威衰，横恩之滥已收而复出，戢贪之诏方严而随弛。命令不疑，则阳纵而不收；主意不坚，则阴闭而不密。陛下可不思致灾之由，而

亟正之哉？”进权礼部侍郎，显文阁待制。卒，谥文安。

洪勋咸淳《临安志》：字伯鲁，咨夔长子。登淳祐四年进士第。少为崔与之、魏了翁所知，仕至兵部尚书。尝为词臣，发明先皇与子之意，人称其有父气骨。卒，赠端明殿学士，谥文清。

元

叶李《元史》本传：字太白，一字舜玉，杭州人。补京学生。宋景定间，伏阙上书，攻贾似道，被窜潭州。宋亡，归隐富春山。至元中召见，询以治道。李历陈古帝王得失成败之由，世祖首肯。时各道儒司悉罢，李因奏：“各道儒学提举及郡教授，实风化所系，请复立提举司，专提调学官，课诸生，上成于太学，以备录用。凡儒户徭役，乞一切蠲免。”可其奏。累擢尚书左丞。始定至元钞法，又请立太学，荐周砥等十人为祭酒等官，帝皆从之。世祖欲徙江南宋宗室大姓于北方，李言：“宋民无故闻徙，必将疑惧，万一奸人乘衅而起，非国之利。”事遂寝。升平章政事，李固辞，许之。以疾得请南还。卒，追封南阳郡公，谥文简。

明

夏时万历《杭州府志》：字以正，钱塘人。永乐戊戌进士，授户科给事中。洪熙改元，议改钞法。时力言其扰市肆，无裨国用。疏留中不下，已而泉币大阻，民辄犯禁，于是始思时言，命侍太子祀祖陵。所至遇歉，辄建白发仓赈之，留署南户科。宣德初，一日三上封事，称旨，命署尚宝司兼吏、礼、兵、刑四科事，身视七篆，综核靡遗，事无怨滞。六年，查后湖黄册，陈便宜十四事，诏行之。擢江西金事，进参议。以大臣会荐，超擢广西左布政使，前后所上又十余疏，皆国家机要事，识者伟其敢言。年未七十，致仕归，卒。

周文万历《杭州府志》：字显谟，富阳人。永乐癸卯举人，选河南道监察御史，巡按广东，赫著声绩。时中官王振方用事，文疏论之。贵州苗贼猖炽，总帅僭师，命文督兵偕靖远伯王骥往剿。至则单车诣贼，宣谕国威，贼果归款。未几，以忧归，卒于家。

赵新《两浙名贤录》：字日新，富阳人。由国子生授工部主事，擢吏部郎中，历史部右侍郎，巡抚江西。综核吏治，使百司无废务。临事筹画，每中机

宜，长于合变。至以漕淮之舟运西江之粟，使兵农两利，民甚便之。仕终吏部尚书。

柴车汤斌《柴车传》：字叔與，钱塘人。永乐二年，以举人授兵部主事，历兵部侍郎。奉敕往山西、辽东、甘肃清屯饬边，所至皆有实绩。正统元年，朵儿只伯寇凉州，命尚书王骥等经略，而以车参赞军务。副总兵刘广援镇番，遇寇而退，反冒功邀赏。车劾其罔上不法。宁夏守将胡清、滕遵丧师失律，镇守太监王贵部下赛因不花等叛亡复归，贵匿不以闻，车并劾奏。帝嘉其公忠，赐白金、文绮。旋以败朵儿只伯，功，进俸一级。车尽心边务，尤杜绝徼幸，凡有功赏，虽奉诏必覆验而后行，诈冒者必据法纠正。岷州土官后能以家人冒功得升赏，车奏罢其所升官，能复以为请，帝宥之。车反覆论其不可，曰：“诈冒如能者非一人，臣方次第按严，今宥能，如诸人何？若无功得官，则捐躯死敌者何以待之？”帝深嘉其忠，复赐白金、文绮。三年，进兵部尚书，仍参赞军务。事平，召还理部事。

沈升《两浙名贤录》：海宁人。永乐初进士，由庶吉士授刑部主事，累迁至太仆寺少卿。升立朝好奖拔善类，凡同年、同官中，有文武才能，堪为时用者，亟疏荐之。后皆不负所举，人多赏其鉴识。

严恭《两湖麈谈》：仁和人。永乐辛卯进士，授御史，命巡按江西。有巨奸姻连藩府，狱久不决。恭卒致大辟。后王师征麓川，恭往司纪功，凯旋，众议当擢台省。时王振怙势，谓人曰：“严御史好官，今有功当升侍郎，胡不见我？”所亲或以讽恭，竟不往，止得贵州参政以去。

邹翰《两浙名贤录》：字宗盛，余杭人。正统己未进士，授兵部主事，历郎中。己巳车驾北狩，京师戒严，择廷臣有才望者佐本兵，金举翰通敏练达，乃超拜本部右侍郎。时寇骑压境，城门昼扃，城外老幼数万余不得入，望堞而号，众议莫敢入。翰曰：“设城本以卫民，今弃民于敌可乎？”迨军出就刍，乃下令军从左出，民从右入，全活无算。翰晓畅军机，临事合变。当守城时，常不待奏报辄行，事赖以济。改礼部右侍郎。河南、凤阳等处大水，受命往赈，奏蠲税粮数万石。寻转左。成化丁亥，特拜南京礼部尚书，召还。后加太子少保，致仕归。卒，赠太子太保，谥康靖。

夏时正王鏊《夏时正墓志》：字季爵，世家慈谿，至其父始迁仁和。正统乙丑进士，授刑部主事，进郎中。虑囚福建，平反殊死狱六十余人。时上杭民

饥，盗且起，时正不及以闻，亟发仓赈给。历升南京大理寺卿。成化七年，被命巡视江西，黜官属贪浊者二百余人，放免无名税十余万，增筑南昌濒江堤及丰城诸县陂岸，复疏时弊二十事以闻。当道有不悦者，遂三上章乞归。《分省人物考》：归仁和，僦居民舍。布政使张瓚为西湖书院于孤山处之，家食三十年。卒年八十八。

江珙万历《杭州府志》：字用良，仁和人。景泰辛未进士，授礼科给事中。尝以六事疏陈，悉关君德民务。已而谏罢僧牒滥行，疏救按察使陈璇冤，又劾奏石亨怙宠罔上，直声赫然。时南阳李贤方柄事，众争趋其门，独珙不可，曰：“吾为谏臣，可媚时宰以自托耶？”居谏垣十年，出为山东参议。又九载，始迁参政，未几乞休。以子澜贵，赠大中大夫。

何琮《献征录》：字文璧，仁和人。景泰甲戌进士，授礼科给事中。正色敢言，多所封驳。成化中，进左通政，掌司事。承规矩废弛之后，莅之以严，宿弊顿革。升兵部左侍郎。

沈锐《分省人物考》：字文进，仁和人。成化己丑进士，授刑部主事，历升江西、广东按察司金事。锐方介寡合，拙于进取，为五品者二十四年，乃稍迁副使，进广东布政，寻陟应天府尹。正德初，进南京刑部右侍郎，值刘瑾用事，锐上疏极言时政，不报，遂乞归。瑾钩摘往事诬之，矫旨夺职。嘉靖初，论旧德复官。

吴雄《献征录》：字文英，仁和人。成化戊戌进士，授刑部主事，升湖广按察使。郴州蛮侵掠居人，有司搜捕，穷诘其党，欲尽致之死。雄言于巡抚，第取首恶诛之，余无所问。拜应天府尹。南畿旱，总漕者亟征兑运米。雄曰：“民困已甚，不可重扰。”奏止之。又请两淮所贮纲米三十余万石以赈饥者，全活甚众。

江澜万历《杭州府志》：字文渊，仁和人。成化戊戌进士，选庶吉士，历升学士。正德初，升詹事府少詹事，晋吏部右侍郎。守官勤慎，严管键，不通尺书，著《铨曹日记》以自检。雅不善逆瑾，改南京礼部尚书。历任三十余年，不治产业。曰：“吾不欲以是上负先德，下累子孙也。”卒，赠太子少保，谥文昭。

李旻嘉靖《浙江通志》：字子阳，钱塘人。成化甲辰进士及第，授翰林修撰，历两京国子祭酒。明习典礼，振举师模，仕至南京吏部侍郎。白钺《李旻

墓志》：旻，貳南太常，时值孝陵水灾，遣朱辅代祭，几斋仪等。旻特疏于朝，遂定两京遣祭之仪。

朱惠《分省人物考》：字懿卿，仁和人。成化丁未进士，擢南湖广道御史。时内竖蒋琮守备南京，以威权排逐缙绅，事多不法。惠抗疏劾之，权奸股栗。弘治丙辰，转湖广佥事，值藩府二役并兴，民不堪命，即为檄请罢止。卒于官。

俞琳《献征录》：字德彰，临安人。成化丁未进士，授监察御史。按行畿辅，发奸摘伏，贪横敛迹。正德戊辰，升礼部右侍郎，改工部。畿辅诸郡告饥，盗且起，上命兼右佥都御史往赈，飭武备，广储积，未旬月间，诸郡安堵。保定有张义官者，潜结群盗为奸，琳捕杀之，盗遂息。召升工部尚书，加太子少保，致仕。

陈珂《分省人物考》：字希白，钱塘人。弘治庚戌进士，授刑部主事，累官右副都御史，巡抚河南。适流贼余党孙郁等为民梗，首命兵剿平之，仍命有司收瘞余骸，勒石表男女死节者。又申冤狱，知县袁铤等五十余员，俱奏请得未减。新野当荆襄之冲，内官私置抽分厂，渔猎民，檄守巡官毁之。正德十年入为大理寺卿，致仕。

胡世宁《献征录》：字永清，号静庵，仁和人。弘治癸丑进士，除德安府推官。时岐王开国，群从怙势横甚，世宁悉以法裁之。王请民间开垦湖田，充柴炭。抚巡业予之，世宁指画利害，乃止。升主事，历员外郎中，出知广西太平郡。所隶悉土官，世宁推心抚之，夷獠贴然。惟太平知州李璫，负固跳踉，乃密檄龙英州赵元瑶扼而执之，积祸顿息。又建置壶关，屹然为一方巨防。母丧服闋，补宝庆。初朝峨王，闻岷府受词，繫人取财。即谕里老，奉有令旨，必并其人送府，验实启行，伪者弗贷。岷府人相戒敛手。郡属粮则繁漫，奸不可诘，乃类田均粮，一色征之，民省岁供之半。升江西副使。时群盗肆抄掠，为饶、信患，世宁设计擒之。又城广昌、南丰、新城。会宸濠有反状，人莫敢言，世宁独上疏曰：“江西之祸，不止盗贼，可虑者宁王。臣请敕王自治其国，勿挠有司，以防未然。”当事下其章，濠恚甚，构飞言诬为离间，逮捕禁狱，欲别附他罪。给事御史交讼其冤，得减死戍辽东。宸濠反，特起戍中，为湖广按察使，寻进右佥都御史，巡抚四川。嘉靖元年，晋吏部右侍郎，未任，奔父丧。时议大礼，廷臣争论，多被扑除名。世宁时家居，疏言：“新进议礼，一言适合，未

必事事皆是；老成执礼，一言过当，未必事事皆非。”凡数千言，上嘉纳之。四年，起兵部左侍郎，进备边二十五事，献《三经讲义》，辞多中群忌，皆留中。言者劾之，改南吏部左侍郎，征为左都御史，掌院事。执政请禁私谒，世宁言：“臣官以察为名，人非接其貌，听其言，无以察其心之邪正，才之短长，若屏绝士夫，徒按考语，则毁誉失真，而求激扬之当难矣。”上是其言，改刑部尚书。陈九畴者，故以兵备甘肃，两败土鲁番兵。土鲁番纵反间，倾九畴，于是下九畴狱，拟大辟。世宁昌言于朝曰：“使世宁司刑，而杀一忠臣，宁先杀世宁。”执政持不可，乃密疏为申理，九畴得不死，戍边。转兵部尚书，加太子太保，引疾致仕。卒，赠少保，谥端敏。

江晓万历《杭州府志》：字景熙，仁和人。正德戊辰进士，历兵部郎中，改吏部，出为山东参议。召商上纳，随时给估，除前揽纳侵耗之弊，遂著为令。升山西右布政使，条陈体国便民六事，悉见施行。擢应天府尹，除奸厘弊，节费劝农，复条奏职掌十事。入为工部右侍郎。为胡守中诬奏，勒归。卒，赠尚书。

钱宏《两浙名贤录》：字可容，钱塘人。正德戊辰进士，授刑部主事，转员外郎，陟山东金事，转副使。时武宗南狩，供应靡纪，当事檄宏取办，随事经纬弗能屈。章邱潦，岁大稔，宏赈恤有方，全活几万。巨珰镇守，役民无常时，宏裁之，不少徇。历升副都御史，提督南赣军务。南赣地属上游，不可一日弛武备，乃刻武艺图以训将士，躬自临阅，军声大振。会疾作，乞归。

陆溥《两浙名贤录》：字元博，钱塘人。正德戊辰进士，授兵部主事。时真鐸谋不轨，逆瑾内应，齐、鲁、赵、魏贼从中起，溥相大司马，运筹决策，群凶以次授首，溥之力居多。既而驾将南征，溥与同省郎伏阙谏止，廷杖几毙。会丁内艰归。服阕，补武选司员外，历郎中，出为江西参议。嘉靖初，诏奖先朝讎讐，改陝西参政，行至灵宝卒，年仅四十有五。与溥同杖者，为仁和江翰林晖，君子以为杭之二直。

许相卿万历《杭州府志》：字台仲，海宁人。正德丁丑进士，授兵科给事中。属世宗新政，乃抗疏论政令不便者数事。先是，中人张锐、张忠恣横，法曹议在死律，内降欲当之赎金，相卿力争之。又李贤以中贵义子袭锦衣，指挥林俊以正人被谮，相卿皆力言其非是，语剴切，多人所不敢言，由是直声振天下。居一年，抗疏致仕归，林居三十年。中外荐者十数，以礼科召，力辞，竟不

起。

江晖《两浙名贤录》：字景孚，仁和人。尚书澜子，侍郎晓弟。正德丁丑进士，选庶吉士。与同馆舒芬等抗疏力谏武宗南巡，受杖几毙，谪广德知州。下车即法其豪梗者，以令于州。省徭役，减供应，以身勤民，民皆悦服。二载，以编修召，寻进修撰。属世宗简侍从，使更民事，擢晖河南金事，未行疾作，许归，卒。《列朝诗集传》：晖，为文钩元猎秘，杂以古文、奇字，聱牙诘曲。与汴人曹嘉东、楚王廷陈、秦马文骥齐名，一时有曹、王、江、马之称。集名《亶爰子》。

邵经邦汪琬《邵经邦传》：字仲德，仁和人。正德庚辰进士，授工部主事，进员外郎。嘉靖三年，诏工部治泰和伯陈万言赐第，费当白金六十万。经邦力谏，不宜宠外戚太过，由是直声大起。内艰服闋，补刑部。《明伦大典》告成之次年十月朔，日食。经邦抗疏言：“陛下已令大学士张璁致仕，寻以议礼有功见留。夫阴盛侵阳，变无大于此者。是以汉制策免三公，而璁顾去而复留何也？臣窃谓，议礼与临政不同，议礼贵当，临政贵公，陛下私议礼之臣，过加非分，使之履盈蹈满，干犯天人之怒，微独非国家福也，亦岂璁辈利哉！”疏入，帝怒，立下诏狱。会乾宁宫西房灾，乃命遣戍镇海卫，于时学士丰熙先戍其地。逾七年，刑部尚书唐龙等乞放还熙、经邦等，不许。又逾二十八年，竟卒于戍所。神宗即位，复故官。万历中，镇海卫人立祠，祀经邦与学士丰熙、主事陈九川为三贤，二人亦以谪戍至镇海者也。《理学见闻录》：经邦戍镇海，建宁杨偲庵曰：“昔期望只是科目中人，今却是圣贤地位。”因益研精覃思，成《三弘录》，《易春秋直解》，学者称弘毅先生。

张瀚汤斌《张瀚传》：字子文，仁和人。嘉靖乙未进士，授南京工部主事，历迁右副都御史，巡抚陕西。甫半载，入为大理卿，历总督漕运。隆庆元年，改督两广军务。万历元年，为吏部尚书，加太子太保。时廷推吏部尚书，首左都御史葛守礼，次工部尚书朱衡，次瀚。张居正恶守礼戇，厌衡骄，故特拔瀚。比居正遭丧，谋夺情，中旨令瀚谕留居正，居正又自为牍风瀚，属吏以覆旨请，瀚佯不喻，谓：“政府奔丧，宜予殊典，礼部事也，何关吏部。”居正复令客说之，不为动，乃传旨责瀚久不奉诏，无人臣礼。廷臣惴恐，交章留居正。瀚独不与，抚膺太息曰：“三纲沦矣。”居正怒，嗾给事中、御史撼他事劾之，勒致仕归。年及八十卒，赠太子少保，谥恭懿。

傅佩《两浙名贤录》：字朝鸣，仁和人。嘉靖乙未进士，授兴化知县，擢兵科给事中。世宗幸承天，佩以才望扈从。武定侯郭勋怙宠，骄恣不法，佩抗疏劾之，忤旨夺职。郊庙礼成，还章服。穆宗改元，起用先朝言事直臣，佩膺首荐，晋秩太常寺少卿，致仕。

童汉臣旧《浙江通志》：字重良，钱塘人。嘉靖乙未进士，为江西道御史。时敌寇雁门，简按山西，为设方略，斩级，夺还子女。既而条陈边计，归咎宰辅严嵩。疏入，嵩大衔之，谪楚藩都事。闻父讣奔归，家居十年。起广东都事，累升江西副使。以母老乞归。

查秉彝《献征录》：字性甫，号近川，海宁人。嘉靖戊戌进士，除黄州司理，征拜礼科给事中。属朝议庄敬太子冠礼，时未知上意所指，莫敢先发，且惮繁节，论如筑舍。秉彝斟酌今古，折繁简而衷之。疏上报可，转户科。会大计群吏，条吏弊七事以上，复与都给事厉汝进、右给事徐养正合疏，劾两淮副使张禄起解盐课，令私亲至京，广通关节。太常少卿严世蕃，凭藉父势，有请托踪迹，宜尽法穷治。疏入，杖阙下。嵩以疏出秉彝手，必欲置之死。会上意解，谪云南定远典史。嵩败，起为建宁司理，累迁至文选郎中。时台省员缺，秉彝议取五十三人，皆极一时之选。迁貳太常，改大理，寻长太仆。平恕精敏，所至底绩。后尹顺天，莅事五日卒，赐祭葬。

高仪万历《杭州府志》：字子象，钱塘人。嘉靖辛丑进士，选庶吉士，授编修，历官礼部尚书，文渊阁大学士，卒赠太子太保，谥文端。仪初入史馆，已卓犖为人所推。时柄臣方以爵禄笼致天下士，多方罗之。仪独抗颜不下，坐是久不调。及柄臣解政，始得进用。庄皇新御，凡郊见上帝、亲耕耤田、临幸辟雍诸大仪节，皆倚办于仪。考据精核，种种如礼。孝烈后以保卫功，祔世宗庙。仪建议孝洁实元后，二后不宜并祔，乃迁孝烈于内殿。朝廷合祀天地，以日月从。至嘉靖间，改分祀。中官李芳建议请合祀。仪执不可，人问其故，仪曰：“即无论分合非是，独奈何使中官得与朝议？”时论伟之。先是，宗藩郭王、驸马郭景和皆以建言得罪，众莫敢理之。仪首倡议，请复封爵。上疏谏南苑游幸，及选女、采玉、取光禄羨银等事，皆人所不敢言。正色立朝，不与时俯仰，难进易退，天下称为正人。卒之日，无问识与不识，莫不惜之。

方廉《两浙名贤录》：字双江，新城人。嘉靖辛丑进士，授南康府推官，征为礼部主事，历升右金都御史，巡抚江南。抗疏直陈民间疾苦，得减赋百余